

Inatsisartut suleriaasianni § 37, imm. 1 naapertorlugu Naalackersuisunut apeqquq imaattoq matumuuna saqummiuppara:

Naalackersuisunut apeqqutit:

- 1. Kalaallit nunatsinni illoqarfikkaarlugit, nunaqarfikkaarlugit, piffiit piffikullu inoqarfiit inoqarfiusimasullu tamakkerlugit illoqarfiit nunaqarfiillu inuerunnikut matunikut ilanngullugit oqaluttuassartaat immikkuutitaarlugit atuagaarngorlugit/paasisutissaaranguanngorlugilluunniit meeqqat atuarfiinut ilinniarfeqarfinnullu atorsinnaangorlugit pilersinneqarnissaat tamaat naammasillugit qanoq akeqassappat?**

(Inatsisartunut ilaasortaq Mette Arqe-Hammeken, Naleraq)

Tunggavilersuut:

Nunarput isorartoorujussuuvoq inoqarfiit inoqarfiusimasullu tamaasa toqqaanaq oqaluttuassartaat innuttaasunit ilisimaneqanngilat. Nunarput ilisimanerulerniarutsigu avaqqussinnaanngilagut inoqarfiit inoqarfiusimasullu tamaasa oqaluttuassartaat ilisimassallugit.

Assersuuteqarsinnaavunga soorlu kalaallisut atuagaaraateqarpugut uumasut nunatsinniittut pillugit paasisutissat aamma nunatsinni naasut pillugit paasisutissat, unali amigaatigisarparput nunatta inoqarfiit inoqarfikullu tamaasa pillugit paasisutissat oqaluttuassartaallu qupperiaannaatillugit, ataatsimut karseeranguamiitillugilluunniit, soorlu assersuutigalugu Siorapaluk aamma Nanortalik paasisaqarfigerusukkullugit karseeranguami tassani atuagaaraasinnaavoq imaluunniit mappersagaq tigorianaasuussaaq, taakku meeqqat atuarfianni oqaluttuarisaanermi atorneqarsinnaasuussapput aamma ilinniarfeqarfinni. Ineriartortissinnaasuussasut takorloorpara suliaasiissutitalinnik atuartunik ilinniartunilluunniit nunatta ilisimanerulernissaanut atugassianngorlugit.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.